

JOANNIS CONRADI RUCKERI
O R A T I O
D E
HONORIBUS ACADEMICIS,
MAGNO DOCTRINAE PRAEMIO.

HABITA CUM
VIRUM ERUDITISSIMUM
DANIELEM D. F. D. N. D. P. D. ABN. VAN ALPHEN;
LUGDUNO BATAVUM,
JURIS UTRIUSQUE DOCTOREM,
More Majorum renuntiaret.
A. D. XIII. Dec. MDCCXXXV.



LUGDUNI BATAVORUM,
Apud SAMUELEM LUCHTMANS, 1735.
Academiae Typographum.

MAGNIFICE RECTOR.
ILLUSTRISSIMI ACADEMIAE
CURATORES.

NOBILISSIMI ET AMPLISSIMI VIRI
PRAETOR, CONSULES, SCABINI,
QUIQUE HIS ESTIS A CONSILIIS ET SECRETIS
VIRI CONSULTISSIMI.

CLARISSIMI PROFESSORES, :
COLLEGAE CONJUNCTISSIMI.

TRIBUNALI ACADEMICO AB ACTIS
VIR SPECTATISSIME.
SACRARUM LITERARUM INTERPRETES
CASTISSIMI.

LECTOR SAGACISSIME.

OMNIUM ARTIUM ET SCIENTIARUM DOCTO-
RES CONSULTISSIMI, EXPERIEN-
TISSIMI, ACUTISSIMI.

CIVES, HOSPITES, CUJUSCUNQUE ORDINIS
HONORATISSIMI.

TU DENIQUE NOBILISSIMA ACADEMICAЕ JUVEN-
TUTIS CONCIO, PATRIAE ET PARENTUM SPES,
ACADEMIAE DECUS, COMMILITONES
SUAVISSIMI.



JOANNIS CONRADI RUCKERI
O R A T I O.

INter ea, quae ad vitae civilis, Reique publicae felicitatem procurandam & stabilendam pertinent, principem locum jure sibi doctrinarum studia vindicare possunt. Non est enim alia res, qua certius ad veram virtutem informentur cives, quam si eorum mores humanioribus disciplinis mature emolliantur: nec alii publicae privatorumque utilitati rectius prospiciunt, quam qui literis variisque scientiis, prudenter administrandae reipublicae necessariis, sunt innutriti. Tolle haec: a nullius rei peritia, a nulla arte & doctrina

instru&us civis, ut in quatuordecim sedeat, vel in ipsa Orchestra, sedebit lapis super lapidem: In curiam vocetur sententiae de summa republica dicendae caussa: Senator erit: sed perpetuo pedarius, cum suam dicere nesciat, quamcunque audiverit probaturus sententiam: Addicatur litigantibus iudex: mirum est, si non perorata, quam non intellexit caussa, graviter ex tabella pronuntiabit; secundum eum se sentire, qui verum dixisset: Cuicunque tandem reipublicae parti administrandae admoveatur, rerum omnium rudis, nec quid decorum & utilitas publica postulet perspicere, nec qua ratione eidem recte consulatur statuere poterit. Ut mirum non sit, tam insignia publice proponi doctrinae praemia, quibus ignavi excitentur, utiliores vero reipublicae cives ab imperita plebe discernantur.

Inter ea vero non ultimo loco numerandi sunt honores, qui in Academiis summae

mae potestatis jussu illis impertiuntur, qui post legitima in togata militia stipendia confecta honestam missionem impetrant. Non ignoro, non omnes aequae magnifice de illis honoribus sentire, & reperiri, quibus scientiae alicujus Doctorem publica auctoritate renuntiari, non adeo videtur honorificum. Sed hi profecto non intelligunt, quid sit Doctoris titulo ornari, nec sciunt, quantum dignitatis sub illo nomine conferatur.

Absit invidia, A. O. O. H. si in hoc argumento Vos paulisper detineam, & *de Honoribus Academicis magno doctrinae praemio*, paucis verba ad Vos faciam. Quia tamen finem dicendi inventurus non essem, si per singula scientiarum & honorum genera spatium vellem, ut brevis sim, in iis solis, quae ad Juris utriusque Doctores spectant, occupatus ero, succincte ostensurus, quam praeclarum, nobile & splendidum sit, in Jureconsultorum ordinem cooptari.

Vos,

Vos , A. O. O. H. enixe rogo quae-
 foque , ut mihi mentes & aures attentas
 praeberere , meamque in dicendo tenuita-
 tem favore Vestro benigne sublevare veli-
 tis.

Eximius honor est quem natalium splen-
 dor conciliat; & merito illustres avos re-
 veremur in illis , quos domestica virtutis
 exempla , menti altius impressa , ad quae-
 vis pulchra & sublimia impellunt & rapi-
 unt. Insignis quoque gloria est , quam si-
 bi pariunt , qui reipublicae defendendae
 caussa fortia hostibus objiciunt pectora , &
 belli gerendi peritia cluunt. At non mino-
 rem esse eorum dignitatem atque praestan-
 tiam , qui variis artibus ac scientis , & prae-
 cipue civili prudentia animum recte imbue-
 runt , facile agnoscent quicunque sciunt ,
 quanto non solum tempore , labore & in-
 dustria opus sit ad eam comparandam ; sed
 etiam quantum honoris propter insignem &
 necessarium plane ejusdem in constituenda
 &

& administranda republica usum, Jurisperitis ab omni tempore habuerint Principum sapientissimi. Augustus sane, & qui ejus exemplum in prudenter administranda republica sequuti sunt alii Principes, non dubitarunt Jureconsultos ad supremos plane honorum gradus evehere: nec solum Scipiones & Caesares, sed Capitones quoque, Cassios, Celsos, Neratios, Julianos, Consules antiqua Roma vidit: vidisset etiam Mucios & Labeones, nisi hi credidissent, eximia juris doctrina conspicio Viro honoris amplius addi posse nihil, & propterea Consulares fasces recusassent. Alii deinceps, ut Aemilius Papinianus, Julius Paulus, Domitius Ulpianus sola juris peritia illustrem Praefecturae Praetorii dignitatem meruerunt.

Tandem cum recentioribus temporibus Academiae passim per Europam essent institutae, ut in illis tanquam bonae mentis officinis ad virtutem formarentur, & quibus

B

bus

bus artibus respublica recte gubernari, augeri & amplificari possit, edocerentur juvenes, visum est nova & digna doctrinae poni praemia. Placuit igitur summis imperantibus, variis honorum titulis & praerogativis exornari, qui strenuam literis navassent operam: & ut de aliis scientiis brevitatis causa nunc taceam, obtinuit inde a quingentis & quod excurrit annis, qui praeclaram in juris doctrina sibi adquisivissent scientiam, & praeter morum honestatem, eruditionem quoque non vulgarem Professoribus in examinibus probassent, plebi exemptos & honestissimis civium deinceps adnumerandos, publica summae potestatis auctoritate & sollemni ritu renunciari in Academiis Juris Utriusque Doctores, nomine, non ut vulgus imperitum judicat, vano & inani, sed, si quod aliud, omnis decoris, dignitatis & honoris pleno.

Augustissimum sane quod in terris habetur, & quo ipsa Majestas se potissimum exhibet,

ferit, in legibus ferendis consistit, & in iure praescribendo, ad cuius normam cives vitam suam omnem componere debeant. Palam vero est, non posse leges sic scribi, ut negotia omnia, quae quandoque inciderint, iis comprehendantur: saepe Legislator brevi rerum & verborum compressione multa complectitur, ut quae in una specie iussit, ad similes produci velit: nonnunquam peculiaris ratio cum movet, ut quid sanciat, quod ad alia quantumvis similia pertinere nolit: in ipsis etiam legum verbis aliquando haerere possis, ut dubites, quo sensu ea sint accipienda. Quod si vero legislator aliquem suae voluntatis constitueret interpretem, qui civibus mentem suam distinctius aperiat, illisque indicet, quae sit vera singulorum sententia, quae extendi, quae restringi debeant: numquid mediocri loco esse, & levem in republica honorem sustinere diceres illum, quem parum abest, ut vivam ipsius legislatoris vocem appellare

possis? atqui hujus modi sunt qui Juris Utriusque Doctores creantur. His enim, postquam certa solidioris doctrinae & civilis sapientiae documenta dederunt, cathedram superiorem conscendendi & jura interpretandi potestas, publica auctoritate conceditur: Hi, ne quis verba captando jus civile calumniari, aut imaginariam quandam acquitatem praetexendo illud subruere & evertere conetur, sese interponere, & veram legum vim ac potestatem, hoc est, ipsam imperantis voluntatem civibus aperire, sacramque legum majestatem tueri jubentur.

Sed accedit & alia non levis dignitas, quae ipsa quoque splendido isto Juris utriusque Doctoris titulo continetur, publicum nempe singularis prudentiae testimonium. Etenim si pulchrum & honorificum habetur, ea rerum agendarum peritia instructum esse, ut alios sapienti consilio regere & juvare possis: si naturaliter suspicimus, quos:

quos ceteris prudentia ita praestare videmus, ut ex eorum sententia negotia nostra ordinata cupiamus; an non insignis plane putari debet Juris Doctorum honor, quorum sapientiam universi laudant & agnoscunt cives, dum in quibuscunque majoris momenti rebus, sibi ipsis diffidentes, cum honesta illa praefatione, *Licetne consulere?* ad eos reverenter accedunt, opem & consilium eorum expetituri. Hic de suprema sua voluntate ordinanda cogitat: sed sollicitum eum habet diligens ista, quam leges exigunt, sollemnium observatio: & metuit, ne irritum fiat quod iterum rediturum non est suum arbitrium, si ad exemplum illius Lucii Titii, rationem animi sui potius, quam praecepta legum secutus, sine ullo jurisperito testamentum suum scribat: si quid minus legitime minusve perite fecerit, parum saepe profuturam esse novit excusationem illam, quod pro jure legitimo haberi debeat hominis sani voluntas: scit neminem

in testamento suo cavere posse, ne leges in eo locum habeant: Ad Juris igitur Doctorem se confert, qui omnem testamenti ordinationem ut digitos suos novit, suaque prudentia testatorem cura & sollicitudine vacuum & otiosum praestat. Ille, ne in negotio contrahendo vel simplicitate sua, vel alterius vafricie capiatur & circumveniat, stipulationis formulam sibi dictari rogat, quo ineluctabili vinculo alterius fidem adstringat, sibi que caveat. Alius patrimonii sui tuendi causa in jure manum conferturus, ne vel vilitigatoris notam incurrat, vel juris ignorantia rem amittat, causam suam ad Legum normam examinari, quibusque argumentis ea adstrui, quibus defendi debeat, doceri cupit. Quaecunque tandem negotia singularem in vita civili desiderant prudentiam, Juris Doctorum opera & consilio explicantur: ad hos in rebus dubiis cives omnes confugiunt: hi cavendo, hi consulendo omnibus prospiciunt. O gloriam in-

incomparabilem ! o praeclarum honorem ! non emendicatis suffragiis, sed libero, ultro accurrentium civium consensu & testimonio singularis virtutis doctrinae & prudentiae laude celebrari. Hac una re olim Gajus Scipio Nasica invidendum illud meruit encomium, ut a Senatu Romano Optimus adpellatus fuerit: hanc ob causam dignus visus est, cui in sacra via publice daretur domus, ut eo facilius ab omnibus, tanquam totius oraculum civitatis consuli posset. Imo Divus Augustus tantam hoc de jure respondendi munere dignitatem contineri putavit, ut ejus conferendi potestatem ad suam ipsius curam transtulerit, nec quemquam responsa dare voluerit, nisi cui ipse honestissimam istam provinciam decrevisset. At idem plane nunc quoque servatur, cum sola summi imperantis auctoritate de jure respondendi potestas iis conceditur, qui Juris utriusque Doctores in Academicis renuntiantur, & ab ipso Principi-

cipe quasi digito civibus demonstrantur , ad quos in arduis ac dubiis negotiis confugiant.

Haec omnia tamen, quantumvis praeclara & eximia, nondum absolvunt splendorem & dignitatem Juris Doctorum, utpote quibus ingens praeterea honoris cumulus accedit ex nobilissimo illo, ipsisque proprio munere, quo causas in foro strenue agendo, & afflictis succurrendo funguntur. Fateor, merito quidem in summo honore haberi, qui fortia hostibus pectora opposcentes, & ut irruentes in patriam inimicos repellant, nec honestissima vulnera excipere, nec ipsum vitae periculum adire recusant: at non minor eorum laus est, qui ambigua causarum fata dirimunt, suaeque defensionis viribus in rebus saepe publicis & privatis lapsa erigunt, fatigata reparant. Pulchre de republica merentur, qui gladiis, clypeis & thoracibus nixi pro ejus salute propugnant: at nihil
uti-

utilitate in publicum illis cedunt, qui gloriosae vocis confisi munimine, laborantium spem, vitam & posteros defendunt. Agant magnificos belli Duces triumphos ob caesa aliquot hostium millia, ob deletas urbes, ob vastatas regiones, tandem, ob extirpatam Heroica virtute humani generis partem: ego unius civis servati, quam mille hostium interemtorum gloriam malletm, nec triumphalem civica potiozem haberem corona. Hac vero toties ornantur Juris Doctores, quoties de bonis, de existimatione, de vita periclitantem civem protegent, tuentur, servant.

Possẽm, A. O. O. H. multa, eaque non levia addere de praerogativis, immunitatibus & privilegiis, quae leges earumque vicaria consuetudo Juris utriusque Doctoribus, dignitatis augendae causa, indulgent: sed quia Lex Academiae me intra certos fines orationem cohibere jubet, ea silentio praetermitto; praesertim cum vel soli ritus, quos

C

Ma-

Majores nostri in conferendo isthoc honore adhiberi voluerunt, satis evincere possint, quam nobile, quam honorificum ipsis visum fuerit Juris Utriusque Doctoris nomen. Sciebant sapientissimi illi Viri, per se splendidum esse Doctoris titulum: sed ut magis splendeat, rite & decore imponi volebant. Habent enim majestatem aliquam, & reverentiam in hominum mentibus excitant, quæcunque cum decore, & ipsam dignitatis amplitudinem exprimente adparatu quodam rite & decenter explicantur. Ut omnino magno opere laudandus sit Eruditissimus hic Candidatus, qui de pulcherrimis, sed nescio quo fato fere oblitteratis Majorum moribus hac parte instaurandis cogitavit. Absit enim ut quisquam, quod revera ad omnium honorem pertinet, ad invidiam trahat, Eumque quasi præerogativam aliquam inter ceteros Juris Doctores affectantem criminetur: abest a candido hoc & humanitatis studiis ad veram virtutem

tem tam curate formato pectore stolidus ille fastus. Potius, ut civibus omnibus constaret, quantum dignitatis in singulos Juris Doctores conferatur, iisdem honoribus, quibus ceteri gaudent, se in publico omnium conspectu ornari, Amplissimi avi & patru sui magni exemplo incitatus modestissime rogavit. Quis vero non probet, quis non laudet tam liberale consilium? Probavit certe, & laudavit vehementer Amplissimus Academiae Senatus, Eumque merito simul dignissimum esse censuit, qui non intra privatos hujus Academiae parietes, sed in frequentissima eruditorum corona sollemnibus honoris in jure supremi ritibus & cerimoniis inauguratur. Laudabunt sine dubio Senatus nostri decretum omnes, quibus eximia Ejus merita recte sunt perspecta. Nihil jam dicam de splendore familiae unde ortus, & nominis amplitudine: etsi enim pulchrum utique est, ex ea gente prognatum esse, quae prudentissi-

mos huic Urbi Consules; quae Reipublicae magnanimos dedit, & difficilibus temporibus constantes publicae libertatis adsertores: non tamen de generis, sed de virtutis & doctrinae gloria hic agitur. Hanc vero Praestantissimus Candidatus noster, ut parto Majorum virtute genti suae decore dignum se redderet, a prima statim aetate viribus omnibus sectandam sibi proposuit: & cum pulcherrimae juris arti se dare constituisset, ad eam sibi comparandam non solum indefesso labore & ferrea plane industria in literarum studia incubuit, sed, quod in omni scientia addiscenda primum est, tam prudentem quoque in instituendis studiis iniecit rationem, ut mirum non sit, eum tandem laudatissimae morum integritati solidam eruditionem & egregiam civilem sapientiam adjunxisse. Etenim ut ad ipsa Veterum tam Graecorum quam Romanorum monumenta aditum sibi pararet, & suis potius quam

quam fallacis saepe interpretis oculis omnia perlustraret , primam , eamque multam operam posuit in utriusque doctae linguae cognitione ; cujus ope deinceps in jucundissima Historiarum & Antiquitatum disciplina tantum profecit , ut eorum , quae de publicis privatisque rebus memorabilia tradiderunt Veteres , insignem plane scientiam sibi adquisiverit. Hac regia via tandem ad ipsos perrexerit juris Auctores , quibuscum dies noctesque habitando , omnem juris studii difficultatem feliciter superavit , & ad intima quaeque artis nostrae se penetravit.

Sed quid verbis opus est ? cum ipse jam saepius publice ediderit egregia diligentiae pariter & doctrinae suae specimina. Vidistis enim ternas , quas intra anni spatium composuit , & in omnium conspectu adversus doctas oppugnantium machinationes masculcule summaque cum laude defendit , eruditae ejus Dissertationes : vidistis , & tan-

quam totidem certissima variae nec vulgaris doctrinae suae monumenta merito laudastis. Quin nunc quoque *de Legibus in republica bene constituta non temere mutantis*, graviter, ornate & docte dicentem Eum audivistis.

Cum vero tot & tanta Egregium Candidatum nostrum commendent sua merita, non potuit non Amplissimus Academiae Senatus, quin eosdem, quos plures, & memorabili exemplo, eodem aliquando die bini ex Alphena gente fratres hoc ipso in loco publice consequuti sunt, summos in utroque jure honores Majorum more & solemni ritu in Eum conferendos decerneret. Nil restat, quam ut ipse mandato mihi munere fungar, & Tibi Eruditissime Candidate, debita modestiae, virtuti, doctrinae Tuae praemia persolvam.

Quod igitur felix & faustum sit, ego, ex Auctoritate Magnifici Rectoris, & Amplissimi Senatus Academici, Te, Daniellem

lem van Alphen , Lugduno Batavum ,
Juris utriusque Doctorem creo , dico , re-
nuncio : Do Tibi potestatem cathedram ,
ad quam solis Doctoris titulo ornatis aditus
patet , conscendendi , jura interpretandi ,
in foro & omnibus ubique tribunalibus
causas agendi , de jure respondendi : Tri-
buo Tibi insuper omnes praerogativas , im-
munitates , jura ac privilegia , quae rite &
legitime creatis Juris utriusque Doctoribus
hic vel alibi , lege aut more tribui solent.
Et ne quid honori Tuo desit , adjiciam
porro ritus , quibus Majores nostri hunc
actum sollemniter explicari , sapientissimo
hocce consilio voluerunt , partim ut colla-
tae dignitatis splendor eo acrius omnium
oculos & mentes feriret ; partim ut signi-
ficarent , non ad ignobilem deinceps desi-
diam velandam , sed ad virtutem ulterius
excitandam honores hosce pertinere.

Argumento sit haec ipsa , qua indutus
es Toga : Vide , ut ea omnium oculos in
se

se convertit: ut singuli tacite Tuam laudant fortunam, qui virtute merueris, ea in publicum produci veste, qua non nisi honestissimis inter cives uti conceditur. Quae vero tam honorifica Tibi est, eadem toga Te simul admonet sacramenti, quo Te togatae militiae obstrinxisti, ut, quam adhuc inter innocentiam & doctas vigilias transegisti, deinceps quoque sic componas vitam Tuam, ut togati militis munere per omnia recte & strenue fungaris, perpetuoque memor sis, signum, quod in hac militia semper unum, semper idem datur, hoc esse; *Laboremus.*

Ne vero inermem Te hosti objiciam, en, quo sacratissimae leges nostrae continentur, Librum, quem apertum Tibi exhibeo, ut ex eo tanquam instructissimo armamentario omnem militarem Tuum adparatum desumas: hinc tuendae innocentiae clypeos: hinc tela petas, quibus Justitiae hostes conficias: non enim insidiosis
ima-

imaginariae aequitatis argumentis, sed aperto Marte, & certa ipsarum legum auctoritate pugnandum est. His igitur perpetuo inhaerendum: in hisce perscrutandis & perpendendis indefesso labore dies noctesque defudandum.

Sed ecce, quem modo Tibi aperui, eundem Librum nunc ante oculos Tuos pono clausum, ut memineris, quae Tibi agenda incumbunt, Lēctione sola minime absolvi: sed multa insuper & seria meditatione opus esse, tum ut mentem & sententiam Legislatoris alte saepe latentem subtiliter indagare, & a similibus ad similia procedendo ex ratione juris definire possis, quae disertis legum verbis definita non reperiuntur: tum ut omnia in usum deducere, & obvenientibus in vita civili negotiis apte & prudenter accommodare scias.

Licet autem laboriosa sit & ardua, cui Te accingis militia, gratam tamen & jucundam eam reddunt amplissima virtutis prae-

D

mia,

mia, quae fortes Viros in ea manent. En, quantus in ipsis statim auspiciis Tibi habeatur honor, dum aureus digito Tuo inferitur annulus. Erat is olim apud Romanos Equestris ordinis ornamentum, & nobiliores a plebe discernebat: Te singulari doctrina & egregia juris scientia nobilem esse indicat. Postquam deinde cum plebe communicatus fuit, ingenuis proprius mansit: Te liberalem animum artibus ingenuis excoluisse significat. Praecipuus vero annuli apud Veteres usus erat in sponsalibus contrahendis & connubiis: Tibi hoc annulo hodie se despondet nobilissima & pulcherrima Virginum Astraea, ut individuum, & ad instar in se redeuntis annuli sine carituram vitae consuetudinem Tecum habeat. Sed quousque patiar tam ornatum Virum aperto mihi adstare capite? quin impono Tibi honoris causa pileum, antiquum libertatis signum. Quid ridetis Auditores? levemne & inanem putatis pilei honorem, quod

quod innumera & plebeja passim capita eodem ornata cernitis? multi, fateor, sed nullo jure eum usurpant: pauci merentur: quotquot enim coeco perturbatae mentis imperu trahuntur, & effraenae licentiae honestum libertatis nomen praetexunt, utcunque pileati, liberi non sunt. Te jure optimo liberum, Te pileo dignum pronuntio, qui didicisti, in nullius nisi rationis & legum verba jurare, his servire, illi obtemperare, solam esse veram & ingenuo homine dignam libertatem.

Probant hanc meam de Te sententiam Amplissimi hujus Urbis Consules, qui Te aureo hoc donant Numismate, ut virtuti & eruditioni Tuae datos honores augeant.

Tandem porrigo Tibi dextram in amicitiae & benevolentiae signum, qua Te, qua literarum & Jurisprudentiae veros amatores omnes complector.

Et cum jam omnia ex meritis votisque Tuis rite sint peracta, ego primus Te Juris

D 2

utrius-

utriusque Doctorem saluto. Faxit Deus, ut qui hodie tam pulchros Tibi pepererunt fructus, deinceps quoque feliciter succedant Tui conatus: crescat Tua, crescat Reipublicae, crescat Academiae Jurisque prudentiae gloria & dignitas, inque dies magis magisque amplificetur.

